

**АЯЛАЛ ЖУУЛЧЛАЛЫН ТУХАЙ ХУУЛИЙН ШИНЭЧИЛСЭН НАЙРУУЛГЫН
ТӨСӨЛ БОЛОН ХАМТ ӨРГӨН МЭДҮҮЛСЭН ХУУЛИЙН ТӨСЛҮҮДИЙГ
ЭЦСИЙН ХЭЛЭЛЦҮҮЛЭГТ БЭЛТГЭСЭН ТАЛААРХ ЭДИЙН ЗАСГИЙН
БАЙНГЫН ХОРООНЫ ТАНИЛЦУУЛГА**

2023 оны 05 дугаар
сарын 03-ны өдөр

Улаанбаатар
хот

Илтгэгч нь: Улсын Их Хурлын гишүүн Х.Ганхуяг

Улсын Их Хурлын дарга, эрхэм гишүүд ээ,

Монгол Улсын Засгийн газраас 2022 оны 11 дүгээр сарын 28-ны өдөр Улсын Их Хуралд өргөн мэдүүлсэн Аялал жуулчлалын тухай хуулийн шинэчилсэн найруулгын төсөл болон хамт өргөн мэдүүлсэн хуулийн төслүүдийн анхны хэлэлцүүлгийг Улсын Их Хурлын 2023 оны 04 дүгээр сарын 27, 28-ны өдрүүдийн чуулганы нэгдсэн хуралдаанаар хэлэлцэн шийдвэрлэж, төслүүдийг эцсийн хэлэлцүүлэгт бэлтгүүлэхээр Эдийн засгийн байнгын хороонд шилжүүлсэн.

Тус Байнгын хороо 2023 оны 05 дугаар сарын 03-ны өдрийн хуралдаанаараа дээрх хуулийн төслүүдийг эцсийн хэлэлцүүлэгт бэлтгэсэн тухай асуудлыг хэлэлцээд, чуулганы нэгдсэн хуралдааны анхны хэлэлцүүлгээр санал хурааж, олонхын дэмжлэг авсан саналуудыг хуулийн төсөлд нэмж тусган, төслийн агуулга, зарчмыг алдагдуулахгүйгээр үг хэллэг, дэс дараалал, бүтцийн шинжтэй засваруудыг хийлээ.

Улсын Их Хурлын чуулганы нэгдсэн хуралдаанаар төслийн анхны хэлэлцүүлгийг явуулах үед төслийн зарим зүйл, заалтыг гүйцээн боловсруулах чиглэлийг хуралдаан даргалагчаас өгсний дагуу Монгол Улсын Их Хурлын чуулганы хуралдааны дэгийн тухай хуулийн 42 дугаар зүйлийн 42.2.1-д заасныг баримтлан 15 зарчмын зөрүүтэй санал, мөн хуулийн төслийн зарим зүйл, заалтаар дахин санал хураах шаардлагатай гэж үзсэн тул Монгол Улсын Их Хурлын чуулганы хуралдааны дэгийн тухай хуулийн 42 дугаар зүйлийн 42.2.3-т заасныг баримтлан 17 зарчмын зөрүүтэй саналаар санал хураалт явуулж, Байнгын хорооны хуралдаанд оролцсон гишүүдийн гуравны хоёроос дээш хувийн саналаар тус тус дэмжсэн болно.

Нэгдсэн хуралдааны анхны хэлэлцүүлгээр олонхын дэмжлэг авсан зарчмын зөрүүтэй саналуудыг төсөлд нэмж тусгасан эцсийн хэлэлцүүлэгт бэлтгэсэн төсөл, Байнгын хорооны танилцуулга, зарчмын зөрүүтэй саналын томъёоллуудыг бэлтгэн Та бүхэнд хүргүүлсэн болно.

Улсын Их Хурлын эрхэм гишүүд ээ,

Аялал жуулчлалын тухай хуулийн шинэчилсэн найруулгын төсөл, Аялал жуулчлалын тухай хууль хүчингүй болсонд тооцох тухай, Иргэний хуульд өөрчлөлт оруулах тухай, Аж ахуйн нэгжийн орлогын албан татварын тухай хуульд нэмэлт, өөрчлөлт оруулах тухай, Зөрчлийн тухай хуульд өөрчлөлт оруулах тухай, Нэмэгдсэн өртгийн албан татварын тухай хуульд нэмэлт, өөрчлөлт оруулах тухай, Амьтны тухай хуульд нэмэлт, өөрчлөлт оруулах тухай, Байгалийн нөөц ашигласны төлбөрийн тухай хуульд нэмэлт оруулах тухай, Улсын тэмдэгтийн хураамжийн тухай хуульд нэмэлт, өөрчлөлт оруулах тухай, Тусгай хамгаалалттай газар нутгийн тухай хуульд нэмэлт, өөрчлөлт оруулах тухай, Төсвийн тухай хуульд нэмэлт оруулах тухай хуулийн төслүүдийг эцсийн хэлэлцүүлэгт бэлтгэсэн талаарх Эдийн засгийн байнгын хорооны танилцуулга, зарчмын зөрүүтэй саналуудыг хэлэлцэн шийдвэрлэж, хуулийн

төслүүдийг эцэслэн баталж өгөхийг Та бүхнээс хүсье.

Анхаарал тавьсанд баярлалаа.

**ЭДИЙН ЗАСГИЙН БАЙНГЫН
ХОРООНЫ ДАРГА**



Ц.ЦЭРЭНПУНЦАГ

**АЯЛАЛ ЖУУЛЧЛАЛЫН ТУХАЙ ХУУЛИЙН ШИНЭЧИЛСЭН
НАЙРУУЛГЫН ТӨСЛИЙН ТАЛААРХ ЗАРЧМЫН ЗӨРҮҮТЭЙ
САНАЛЫН ТОМЬЁОЛОЛ**

1.Төслийн 3 дугаар зүйлийн 3.1 дэх хэсгийг доор дурдсанаар өөрчлөн найруулах:

“3.1.Энэ хуулиар Монгол Улсын нутаг дэвсгэр дэх аялал жуулчлалын үйл ажиллагааг зохицуулна.”

**Санал гаргасан: Эдийн засгийн
байнгын хороо**

2.Төслийн 10 дугаар зүйлийн 10.1 дэх хэсгийн “Хөтөч” гэсний өмнө “Аялал жуулчлалын мэргэжилтэй, эсхүл” гэж, мөн зүйлийн 10.2.2 дахь заалтын “үндэсний” гэсний өмнө “хууль тогтоомж,” гэж, 10.3 дахь хэсгийн “журмыг” гэсний өмнө, 10.4 дэх хэсгийн “чиг үүргийг” гэсний өмнө “болон мэргэжлийн ур чадварын зэрэглэл тогтоох” гэж тус тус нэмж, мөн 10.4 дэх заалтын “журмын дагуу” гэснийг хасах.

**Санал гаргасан: Эдийн засгийн
байнгын хороо**

3.Төслийн 10 дугаар зүйлд доор дурдсан агуулгатай 10.2 дахь хэсэг нэмэх:

“10.2.Нутгийн иргэдэд түшиглэсэн аялал жуулчлал эрхлэхэд энэ хуулийн 10.1-д заасан шаардлага хамаарахгүй.”

**Санал гаргасан: Эдийн засгийн
байнгын хороо**

4.Төслийн 15 дугаар зүйлийг доор дурдсанаар өөрчлөн найруулах:

“15 дугаар зүйл.Даатгал

15.1.Тур оператор, аяллын агент нь үйл ажиллагаандаа алдаа гаргасны улмаас үйлчлүүлэгчид учруулсан хохирлыг нөхөн төлөх зорилгоор хариуцлагын даатгалд заавал даатгуулна.

15.2.Өндөр уулын авиралт, спорт агнуур, олзворын ан, усны гүнд шумбах, авто спорт, нисдэг тэрэгний аялалд оролцох жуулчин, жуулчны хөтөч-тайлбарлагч, мэргэшсэн сургагч багш, зааварлагч нь гэнэтийн ослын даатгалд заавал даатгуулна.

15.3.Энэ хуулийн 15.2-т зааснаас бусад эрсдэл бүхий аялалд оролцох жуулчин, жуулчны хөтөч-тайлбарлагч, мэргэшсэн сургагч багш, зааварлагч нь гэнэтийн ослын даатгалд даатгуулж болно.

15.4.Энэ хуулийн 15.2-т заасан даатгалд хамруулах үйл ажиллагааг аялал жуулчлалын байгууллага хариуцан зохион байгуулна.

15.5.Энэ хуулийн 15.1, 15.2-т заасан даатгалын эрсдэл, нөхцөл, үнэлгээ, хяналт тавих журмыг аялал жуулчлалын асуудал эрхэлсэн төрийн захиргааны төв байгууллага Санхүүгийн зохицуулах хороотой хамтран батална.”

**Санал гаргасан: Эдийн засгийн
байнгын хороо**

5.Төслийн 19 дүгээр зүйлийн 19.3 дахь хэсгийн “хамгаалах, байгаль, түүх, соёлын өвийг” гэснийг “байгаль, түүх, соёлын өв, аялал жуулчлалын нөөцийг” гэж, 19.5 дахь хэсгийн “мөрдөгдөх техникийн зохицуулалтад нийцсэн газар зохион байгуулалтын болон” гэснийг “аялал жуулчлалын үйл ажиллагаа, газар ашиглалтад холбогдох техникийн зохицуулалт, стандартыг мөрдөх бөгөөд түүнд нийцсэн” гэж, 19.7 дахь хэсгийн “газар зохион байгуулалтын нэгдсэн санд” гэснийг “газрын нэгдмэл сангийн удирдлагын нэгдсэн цахим системд” гэж, 19.9 дэх заалтын “аймаг, нийслэлийн асуудал” гэснийг “аймаг, нийслэлийн аялал жуулчлалын асуудал” гэж, мөн 19 дүгээр зүйлийг 16 дугаар зүйл болгон тус тус өөрчилж, 19.12 дахь хэсгийн “газар нутгийн” гэснийг, 19.6 дахь хэсгийн “газар зохион байгуулалтын болон” гэснийг хасах.

**Санал гаргасан: Эдийн засгийн
байнгын хороо**

6.Төслийн 19 дүгээр зүйлийн 19.8 дахь хэсгийг доор дурдсанаар өөрчлөн найруулах:

“19.8.Орон нутгийн аялал жуулчлалын бүс нь менежментийн төлөвлөгөөтэй байна. Орон нутгийн аялал жуулчлалын бүсийн газар зохион байгуулалтын асуудлыг аймаг, нийслэл, сум, дүүргийн газар зохион байгуулалтын төлөвлөгөөний дагуу хэрэгжүүлнэ.”

**Санал гаргасан: Эдийн засгийн
байнгын хороо**

7.Төслийн 19 дүгээр зүйлд доор дурдсан агуулгатай 19.9 дэх хэсэг нэмэх:

“19.9.Улсын аялал жуулчлалын бүсэд хамаарах аймаг, нийслэл, сум, дүүргийн газар зохион байгуулалтын төлөвлөгөөнд аялал жуулчлалын газрын ашиглалт, хамгаалалтын асуудлыг тусгаж, хэрэгжүүлэхдээ энэ хуулийн 19.5-д заасан техникийн зохицуулалт, стандартыг мөрдөнө.”

**Санал гаргасан: Эдийн засгийн
байнгын хороо**

8.Төслийн 19 дүгээр зүйлд доор дурдсан агуулгатай 19.15 дахь хэсэг нэмэх:

“19.15.Улсын болон орон нутгийн аялал жуулчлалын бүсэд үйл ажиллагаа эрхлэх аялал жуулчлалын үйлчилгээний байгууллага, нутгийн иргэдэд түшиглэсэн

аялал жуулчлал эрхлэгч хоорондын орон зайн төлөвлөлтөд холбогдох техникийн зохицуулалт, стандартыг заавал дагаж мөрдөнө.”

**Санал гаргасан: Эдийн засгийн
байнгын хороо**

9.Төслийн 4 дүгээр зүйлд доор дурдсан агуулгатай 4.1.13 дахь заалт нэмэх: “

“4.1.13.“Аялал жуулчлалын бүсийн менежментийн төлөвлөгөө” гэж аялал жуулчлалын бүсийн байгалийн нөөц, түүх, соёлын дурсгалыг хамгаалах, зохистой ашиглах, сөрөг нөлөөллийг бууруулах, урьдчилан сэргийлэх, тогтвортой аялал жуулчлалыг хөгжүүлэхэд чиглэсэн богино болон дунд хугацааны төлөвлөгөөг.”

**Санал гаргасан: Эдийн засгийн
байнгын хороо**

10.Төслийн 20 дугаар зүйлийг 17 дугаар зүйл болгон доор дурдсанаар өөрчлөн найруулах:

17 дугаар зүйл.Отоглох цэг

17.1.Улсын аялал жуулчлалын бүс болон улсын тусгай хамгаалалттай газар нутагт аялал жуулчлалын эрэлт, байгаль орчны даацыг үндэслэн байгаль орчны асуудал эрхэлсэн төрийн захиргааны төв байгууллага отоглох цэг байгуулах байршлыг тогтооно.

17.2.Энэ хуулийн 17.1-д заасан улсын тусгай хамгаалалттай газар нутагт отоглох цэгийг улсын төсвийн, тухайн тусгай хамгаалалттай газар нутгийн хамгаалалтын захиргааны, олон улсын төслийн болон хувийн хэвшлийн хөрөнгө оруулалтаар байгуулна.

17.3.Энэ хуулийн 17.1-д заасан улсын тусгай хамгаалалттай газарт отоглох цэгийн менежментийг тусгай хамгаалалттай газар нутгийн хамгаалалтын захиргаа хэрэгжүүлэх бөгөөд менежментийг гэрээний үндсэн дээр хуулийн этгээд, орон нутгийн иргэнээр гүйцэтгүүлж болно.

17.4.Энэ хуулийн 17.1-д заасан улсын аялал жуулчлалын бүс нь улсын тусгай хамгаалалттай газартай давхцаагүй тохиолдолд тухайн аялал жуулчлалын бүс дэх отоглох цэгийн менежментийг гэрээний үндсэн дээр хуулийн этгээд, орон нутгийн иргэнээр гүйцэтгүүлж болно.

17.5.Энэ хуулийн 17.4-т заасан отоглох цэгийн менежментийг гэрээний үндсэн дээр гүйцэтгэх этгээдийг аялал жуулчлалын асуудал эрхэлсэн төрийн захиргааны төв байгууллага сонгон шалгаруулна.

17.6.Энэ хуулийн 17.1-д заасан улсын тусгай хамгаалалттай газарт отоглох цэгийн үйлчилгээний хураамж авах, зарцуулахтай холбогдсон харилцааг Тусгай хамгаалалттай газар нутгийн тухай хуулиар зохицуулна.

17.7.Отоглох цэг нь байнгын, эсхүл түр байж болох бөгөөд стандартын шаардлага хангасан байна.

17.8.Отоглох цэгт олон нийтийн аюулгүй байдлыг хангах харилцааг Цагдаагийн албаны тухай хуулиар зохицуулна.”

**Санал гаргасан: Эдийн засгийн
байнгын хороо**

11.Төслийн 19 дүгээр зүйлийн 19.1.6 дахь заалтыг хасах.

**Санал гаргасан: Эдийн засгийн
байнгын хороо**

12.Төслийн 25 дугаар зүйлийн 25.1.3 дахь заалтыг хасах.

**Санал гаргасан: Эдийн засгийн
байнгын хороо**

13.Төслийн 27 дугаар зүйлийг 26 дугаар зүйл болгон доор дурдсанаар өөрчлөн найруулах:

“26 дугаар зүйл.Аялал жуулчлалын мэргэжлийн холбоо

26.1.Аялал жуулчлалын мэргэжлийн холбоо нь тур оператор, аяллын агент, аялал жуулчлалын үйлчилгээний байгууллага, жуулчны хөтөч-тайлбарлагч, нутгийн иргэдэд түшиглэсэн аялал жуулчлал эрхлэгчийн нэгдэл бүхий, ашгийн төлөө бус нийтийн эрх зүйн хуулийн этгээд байна.

26.2.Аялал жуулчлалын мэргэжлийн холбоо нь аялал жуулчлалын үйл ажиллагаанд оролцогчдыг сургалт, зөвлөгөө, мэдээлэл, мэргэжлийн арга зүйгээр хангах, аялал жуулчлалын байгууллагын ажилтны мэргэжлийн ёс зүйн дүрмийг батлах болон энэ хуульд заасан чиг үүргийг хэрэгжүүлнэ.

26.3.Аялал жуулчлалын мэргэжлийн холбооны дүрэм, удирдлагын бүтэц, санхүүжилт, зохион байгуулалтын бусад асуудлыг бүх гишүүдийн хурлаар бие даан шийдвэрлэнэ.

26.4.Аялал жуулчлалын мэргэжлийн холбоо нь тухайн жилийн үйл ажиллагааны тайлангаа дараа оны 4 дүгээр сарын 01-ний өдрийн дотор аялал жуулчлалын асуудал эрхэлсэн төрийн захиргааны төв байгууллагад хүргүүлж, олон нийтэд нээлттэй мэдээлнэ.”

**Санал гаргасан: Эдийн засгийн
байнгын хороо**

14.Төслийн 32 дугаар зүйлийг доор дурдсанаар өөрчлөн найруулах:

“32 дугаар зүйл.Шилжилтийн үеийн зохицуулалт

32.1.Энэ хуулийн 26.1-д заасан нийтийн эрх зүйн хуулийн этгээдийг үүсгэн байгуулах хурлыг аялал жуулчлалын асуудал эрхэлсэн Засгийн газрын гишүүний баталсан журмын дагуу аялал жуулчлалын асуудал эрхэлсэн төрийн захиргааны төв байгууллага энэ хууль батлагдсан өдрөөс хойш 90 хоногийн дотор зохион байгуулна.

32.2.Энэ хууль батлагдсан өдрөөс өмнө байгуулагдан аялал жуулчлалын салбарт үйл ажиллагаа явуулж байгаа тур оператор, аяллын агент, аялал жуулчлалын үйлчилгээний байгууллага хамтран энэ хуулийн 26.1-д заасан нийтийн эрх зүйн хуулийн этгээдийг үүсгэн байгуулна.

32.3.Аялал жуулчлалын асуудал эрхэлсэн төрийн захиргааны төв байгууллага энэ хуулийн 32.1-д заасан хуралд оролцох байгууллагыг нээлттэй бүртгэх ба тур оператор, аяллын агент, аялал жуулчлалын үйлчилгээний байгууллагын зохистой харьцааг хангаж хурлыг зохион байгуулна.

**Санал гаргасан: Эдийн засгийн
байнгын хороо**

15.Төслийн Гуравдугаар бүлгийн гарчгийг “АЯЛАЛ ЖУУЛЧЛАЛЫН БҮС” гэж өөрчилж, 13 дугаар зүйлийг 18 дугаар зүйл болгон Гуравдугаар бүлэгт тусгах.

**Санал гаргасан: Эдийн засгийн
байнгын хороо**

16.Төслийн Дөрөвдүгээр бүлгийн гарчгийг “АЯЛАЛ ЖУУЛЧЛАЛЫН ТАЛААР ТӨРИЙН БОЛОН НУТГИЙН ӨӨРӨӨ УДИРДАХ БАЙГУУЛЛАГА, МЭРГЭЖЛИЙН ХОЛБООНЫ БҮРЭН ЭРХ” гэж өөрчлөх.

**Санал гаргасан: Эдийн засгийн
байнгын хороо**

17.Төслийн 19 дүгээр зүйлийн 19.1.5 дахь заалтын “хуулийн” гэсний дараа “6.5, 20.5,” гэж, 20 дугаар зүйлийн 20.1.1 дэх заалтын “боловсруулах” гэсний дараа “, хэрэгжүүлэх асуудлаар санал гаргах” гэж тус тус нэмэх.

**Санал гаргасан: Эдийн засгийн
байнгын хороо**

18.Төслийн 21 дүгээр зүйлийн 21.1.11 дэх заалтыг доор дурдсанаар өөрчлөн найруулах:

“21.1.11. аялал жуулчлалын дэд бүтцийг бий болгоход дэмжлэг үзүүлэх;”

**Санал гаргасан: Эдийн засгийн
байнгын хороо**

**ЗӨРЧЛИЙН ТУХАЙ ХУУЛЬД ӨӨРЧЛӨЛТ ОРУУЛАХ ТУХАЙ
ХУУЛИЙН ТӨСЛИЙН ТАЛААРХ ЗАРЧМЫН ЗӨРҮҮТЭЙ
САНАЛЫН ТОМЬЁОЛОЛ**

1.Төслийн 1 дүгээр зүйлийг доор дурдсанаар өөрчлөх.

“1 дүгээр зүйл.Зөрчлийн тухай хуулийн 10.14 дүгээр зүйлийг доор дурдсанаар өөрчлөн найруулсугай:

“10.14.Аялал жуулчлалын тухай хууль зөрчих

1.Аялал жуулчлалын үйлчилгээний байгууллага нь үйлчилгээний стандарт, техникийн зохицуулалт, зэрэглэлд тавигдах шаардлагыг зөрчиж үйл ажиллагаа явуулсан бол хуулийн этгээдийг таван зуун нэгжтэй тэнцэх хэмжээний төгрөгөөр торгоно.”

**Санал гаргасан: Эдийн засгийн
байнгын хороо**

**ТУСГАЙ ХАМГААЛАЛТТАЙ ГАЗАР НУТГИЙН ТУХАЙ ХУУЛЬД
НЭМЭЛТ, ӨӨРЧЛӨЛТ ОРУУЛАХ ТУХАЙ ХУУЛИЙН ТӨСЛИЙН
ТАЛААРХ ЗАРЧМЫН ЗӨРҮҮТЭЙ САНАЛЫН ТОМЬЁОЛОЛ**

1.Төслийн 1 дүгээр зүйлд доор дурдсан агуулгатай 1 дэх заалт нэмэх:

1/33 дугаар зүйлийн 4 дэх хэсэг:

“4.Улсын болон орон нутгийн төсвийн хөрөнгөөр байгаль хамгаалал, соёл, аялал жуулчлалыг дэмжихэд чиглэсэн үйл ажиллагаа явуулах шаардлагаар төрийн захиргааны төв болон төрийн захиргааны байгууллага, нутгийн захиргааны байгууллага тусгай хамгаалалттай газар нутагт газар ашиглахтай холбоотой харилцаанд энэ хуулийн 27.12-т заасан журам үйлчлэхгүй бөгөөд хүсэлтийг үндэслэн гэрээ байгуулж ашиглуулна.”

**Санал гаргасан: Эдийн засгийн
байнгын хороо**

2.Төслийн 1 дүгээр зүйлийн 1 дэх заалтыг доор дурдсанаар өөрчлөн найруулах:

2/33 дугаар зүйлийн 5 дахь хэсэг:

“5.Аялал жуулчлалын тухай хуулийн 4 дүгээр зүйлийн 4.1.9-д заасан аялал жуулчлалын дэд бүтцийг хөгжүүлэх, бий болгох зорилгоор газар ашиглах хүсэлт гаргасан иргэн, хуулийн этгээдэд газар ашиглах эрх олгоход Зөвшөөрлийн тухай хуулийн 1.5 дугаар зүйлийн 10-т заасныг үндэслэн сонгон шалгаруулалтыг хялбаршуулсан журмаар энэ хуульд заасны дагуу явуулж болно.”

**АМЬТНЫ ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ
ТУХАЙ ХУУЛИЙН ТӨСЛИЙН ТАЛААРХ ЗАРЧМЫН
ЗӨРҮҮТЭЙ САНАЛЫН ТОМЬЁОЛОЛ**

1.Төслийн 1 дүгээр зүйлийг доор дурдсанаар өөрчлөн найруулах:

“1 дүгээр зүйл.Амьтны тухай хуульд доор дурдсан агуулгатай 29² дугаар зүйл нэмсүгэй:

1/29² дугаар зүйл.Тусгай зориулалтаар агнуурын амьтан агнах, барих тусгай зөвшөөрлийн дуудлага худалдаа зохион байгуулах

29².1.Агнуурын амьтныг тусгай зориулалтаар агнах, барих эрхийг Зөвшөөрлийн тухай хуулийн 5.6 дугаар зүйлд заасны дагуу нээлттэй дуудлага худалдааны журмаар олгох бөгөөд дуудлага худалдааг цахим хэлбэрээр явуулж болно.

29².2.Байгаль орчны асуудал эрхэлсэн төрийн захиргааны төв байгууллага энэ хуулийн 26.3-д заасны дагуу гаргасан Засгийн газрын шийдвэр, агнуурын нарийвчилсан төлөвлөгөөг үндэслэн, тусгай зориулалтын ан амьтан агнах, барих тоо хэмжээг аймаг, нийслэл тус бүрээр тогтооно.

29².3.Дуудлага худалдааг тусгай зориулалтаар агнах, барих амьтны тоо хэмжээг баталсан шийдвэр гарснаас хойш 14 хоногийн дотор нийтэд мэдээлж, 30 хоногийн дотор аймаг, нийслэлийн Засаг дарга зохион байгуулна.

29².4.Дуудлага худалдааг явуулах хугацааг товлосон шийдвэрийг дуудлага худалдаа явагдахаас 14-өөс доошгүй хоногийн өмнө гаргах ба дараах мэдээллийг тусгана:

29².4.1.дуудлага худалдаа явуулах он, сар, өдөр, цаг, хаяг;

29².4.2.тухайн аймагт ноогдох дуудлага худалдаанд оруулах тусгай зориулалтаар агнах, барих амьтны тоо, төрөл зүйлийн жагсаалт;

29².4.3.дуудлага худалдааны босго үнэ, дэнчингийн хэмжээ, төлөх хугацаа;

29².4.4.хуульд заасан бусад.

29².5.Энэ хуулийн 29².4.3.-т заасан дуудлага худалдааны босго үнэ нь тухайн амьтны Засгийн газраас тогтоосон жишиг үнийн 20 хувь байна.

29².6.Дуудлага худалдааны дэнчин нь энэ хуулийн 29².5-д заасан босго үнийн 50 хувь байх бөгөөд дэнчинг дуудлага худалдаанд оролцохоос 24 цагийн өмнө урьдчилан төлж, бүртгүүлсэн байна.

29².7. Дуудлага худалдаанд ялсан оролцогчийн дэнчинг дуудлага худалдааны үнийн дүнд оролцуулан тооцох ба ялаагүй оролцогчийн дэнчинг 14 хоногийн дотор буцаан олгоно.

29².8. Дуудлага худалдаанд хоёр, түүнээс дээш этгээд оролцох хүсэлтээ ирүүлж, үнийн санал өгсөн тохиолдолд дуудлага худалдааг хүчинтэйд тооцно.

29².9. Дэнчин төлж бүртгүүлсэн этгээд, эсхүл түүний итгэмжлэгдсэн төлөөлөгч дуудлага худалдаанд оролцоно.

29².10. Дуудлага худалдаанд ялсан этгээд нь дуудлага худалдааны үнийг дуудлага худалдаа дууссанаас хойш ажлын таван өдрийн дотор төлнө.

29².11. Дуудлага худалдааны ялагч нь энэ хуулийн 29².10-т заасан хугацаанд дуудлага худалдааны үнийг төлөөгүй тохиолдолд дэнчингээ алдах ба дараагийн өндөр үнийн санал гаргасан этгээдэд санал тавина.

29².12. Дуудлага худалдаанд хоёр, түүнээс дээш оролцогч оролцоогүй, эсхүл үнэ хаялцаагүй, эсхүл энэ хуулийн 29².11-т зааснаар дараагийн өндөр үнийн санал гаргасан оролцогчид тавьсан саналыг хүлээн аваагүй тохиолдолд дуудлага худалдааг хүчингүй болгож, 14 хоногийн дотор хоёр дахь дуудлага худалдааг явуулна.

29².13. Дуудлага худалдааны ялагч нь агнуурын бүс нутгийн менежмент хариуцагч бол тусгай зөвшөөрлийг өөрийн менежмент хариуцдаг агнуурын бүс нутаг дээр бүртгүүлж, баталгаажуулна.

29².14. Дуудлага худалдааны ялагч нь агнуурын бүс нутгийн менежмент хариуцагчаас өөр этгээд бол тухайн аймгийн аль нэг агнуурын бүс нутгийн менежмент хариуцагчтай ан агнуулах гэрээ байгуулна.

29².15. Аймаг, нийслэлийн Засаг дарга дуудлага худалдааны төлбөр, агнуурын нөөц ашигласны төлбөр, хураамжийг төлсөн баримт, энэ хуулийн 29².14-т заасан гэрээг үндэслэн ан агнах тусгай зөвшөөрөл олгоно.

29².16. Энэ хуулийн 29².15-д заасан тусгай зөвшөөрлийг бусдад шилжүүлэхгүй.

29².17. Дуудлага худалдааны үнийн дүнгийн орлогыг Төсвийн тухай хуулийн 23.7.4, 23.9.4-т заасны дагуу орон нутгийн төсөвт төвлөрүүлнэ.

29².18. Дуудлага худалдаанаас орсон орлогыг орон нутгийн төсөвт төвлөрүүлсэний дараа үнийн дүнгийн 20 хувийг агнуурын бүс нутгийн амьтны нөөцийг хамгаалах, өсгөн үржүүлэх арга хэмжээнд зориулан менежмент хариуцагчид олгоно.”

**Санал гаргасан: Эдийн засгийн
байнгын хороо**

2.Төслийн 3 дугаар зүйлийн 2 дахь заалт буюу 29 дүгээр зүйлийн 29.1 дэх хэсгийг хасах.

**Санал гаргасан: Эдийн засгийн
байнгын хороо**

3.Төслийн 4 дүгээр зүйлийг доор дурдсанаар өөрчлөн найруулах:

“4 дүгээр зүйл.Амьтны тухай хуулийн 10 дугаар зүйлийн 10.1.9 дэх заалтын “бүх төрлийн” гэснийг “моторын багтаамж нь 50, түүнээс дээш морины хүчтэй моторт” гэж, 29¹ дүгээр зүйлийн гарчгийн “Дуудлага худалдаа зохион байгуулах” гэснийг “Ховор амьд амьтны цуглуулга хийх, үйлдвэрлэлийн зориулалтаар агнуурын амьтан агнах, барих тусгай зөвшөөрлийн дуудлага худалдаа зохион байгуулах” гэж, 29¹ дүгээр зүйлийн 29^{1.2} дахь хэсгийн “мөн хуулийн 26.3-т заасны дагуу Засгийн газраас тусгай зориулалтаар агнах, барих амьтны тоо хэмжээг баталсан” гэснийг “эрх бүхий байгууллагын” гэж тус тус өөрчилсүгэй.”

**Санал гаргасан: Эдийн засгийн
байнгын хороо**

4.Төслийн 5 дугаар зүйлийн “хассугай.” гэсний өмнө “, 29¹ дүгээр зүйлийн 29^{1.1} дэх хэсгийн “тусгай болон” гэснийг тус тус” гэж нэмэх.

**Санал гаргасан: Эдийн засгийн
байнгын хороо**

5.Төслийн 6 дугаар зүйлийг доор дурдсанаар өөрчлөн найруулах:

“6 дугаар зүйл.Энэ хуулийг Аялал жуулчлалын тухай /шинэчилсэн найруулга/ хууль хүчин төгөлдөр болсон өдрөөс эхлэн дагаж мөрдөнө.”

**Санал гаргасан: Эдийн засгийн
байнгын хороо**

**НЭМЭГДСЭН ӨРТГИЙН АЛБАН ТАТВАРЫН ТУХАЙ ХУУЛЬД
НЭМЭЛТ, ӨӨРЧЛӨЛТ ОРУУЛАХ ТУХАЙ ХУУЛИЙН
ТӨСЛИЙН ТАЛААРХ ЗАРЧМЫН ЗӨРҮҮТЭЙ
САНАЛЫН ТОМЬЁОЛОЛ**

1.Төслийн 1 дүгээр зүйлийн 1 дэх заалтыг хасах.

**Санал гаргасан: Эдийн засгийн
байнгын хороо**

----oOo----